



## Aningaasaqarnermut Naalakkersuisoq

Ulloq: 18. februar 2013

J.nr.: 01.31.06/13-00619

### Aningaasaqarnermut Akileraartarnermullu Ataatsimiititaliap sisamangornermi ulloq 14. februar 2013-imi aalajangiineranik Naalakkersuisunut ilisimatitsineq (suliaq nr. 01.31.06/13-00619)

#### 2013-imi kommunalbestyrelsinut qinersinermi partiit qineqqusaarnermut peqataanissamut tapiiffigineqarnissannik partiit Inuit Ataqatigiit, Atassutip, Kattusseqatigiit Partiiata aamma Siumup qinnuteqaataat

Naalakkersuisut inassuteqaataa;

- kontomi 77.03.01-imi, Partiit qineqqusaarnissaannut tapiissutinut tunngasumi, aningaasaliissutit 1.402.000 kroninik amerlineqassasut,
- konto pingaarnermi 20.11.50-imi, Ingerlatsinermut sillimmatinut tunngasumi, aningaasaliissutit 1.402.000 kroninik ikilineqassasut.

#### Aningaasaqarnermut Ataatsimiititaliap oqaaseqaatai

Qinnuteqarnermikkut Naalakkersuisut kissaatigaat aningaasanik immikkoortitsisoqassasoq, taamaaliornikkut 2013-imi kommunalbestyrelsinut qinersinissamut partiit qineqqusaarnerannut tapiissuteqartoqarsinnaaqullugu. Ilassutitut aningaasaliissuteqarnissamik qinnuteqaat ulloq 4. februar 2013 – Inatsisartunut qinersinissap nalunaarutigineqarnerata kingorna – Aningaasaqarnermut Ataatsimiititaliamit tiguneqarpoq.

Inatsisartunut qinersinissaq nalunaarutigineqaraangat Naalakkersuisut taamatullu Inatsisartut sulineranni periutsit immikkut ittut atuutilersarput. Inatsisartut Naalakkersuisullu pillugit Inatsisartut inatsisaanni § 29-imi allassimavoq Naalakkersuisuugallartut susassaqarfiit ingerlaqqinnissaat qulakkeerniarlugu pisariaqartut kisiisa iliuuserisassagaat. Aalajangersakkamut tassunga nassuiaatini allassimavoq suliniutit ingerlareersut qineqqusaalernermit qineqqusaarnermulluunniit ilaasutut salliutinniarneqartutut isigineqarsinnaasut Naalakkersuisunit aamma ingerlanneqassanngitsut. Malittarisassaq taamaalilluni Naalakkersuisut aningaasaliissutinik, piginnaatitsissutinik imaluunniit atorfimmuut atugassiissutinik qineqqusaarnerup il.il. nalaani taamaaliortusnaanani iluaqutiginninniarnermik pasilliisoqarsinnaaneranut illersuutitut atorpoq.

Periutsit taakku assingi Inatsisartunut aamma Aningaasaqarnermut Ataatsimiititaliamut atuupput. Taamaalilluni qinersinerup nalunaarutigineqarnerata kingorna ilassutitut aningaasaliissuteqarnissamik qinnuteqaatit suliarineqarnissaat pillugu ataatsimiititaliap suleriaasiani aalajangersagaqarpoq. Aningaasaliinissamik siunertap


kinguartinneqarsinnaannginnera, politikimut tunngasuunnginnera aammalu pisariaqarnera sinnerlugu Inatsisartut nutaat aningaasaqarnikkut iliuuserisinnaasaannik killiliinnginnera pillugu ataatsimiititaliap isumaqatigiilluni naliliinissaa aalajangersakkami piunasaqaataavoq. Aalajangersakkakkut piunasaqaataasut eqquutsinneqanngillat.

### **Aningaasaqarnermut Ataatsimiititaliap aalajangiinera**

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliap **suliarisinnaanngilai**.

Taamaalilluni qinnuteqaat atorunnaarpoq, qinersinerullu kingorna Naalakkersuisutut nutaatut inissitsitertut partiit 2013-imi kommunalbestyrelsinut qineqqusaarnerannut tapiissuteqarnissaq kissaatigunikku, taamanikkussamut Aningaasaqarnermut Ataatsimiititaliaasumut qinnuteqaammik nutaamik nassiussissapput.

### **Ataatsimiititaliap sinnerlugu**



Andreas Uldum

Ataatsimiititaliap siulittaasua